

Euskara lan-munduan sustatzeko hitzarmena

Kokapena.

Badira dagoeneko 30 urte baino gehiago Bergarako ume eta gazteek euren derrigorrezko ikasketak D ereduan egiten dituztela.

Eskolaz kanpoko munduan (kulturan, kirolean, aisian...) ere aurrerapauso nabarmenak egin dira azken urteetan eta nagusiki euskaraz funtzionatzen du.

Lan-munduan, aldiz, euskararen presentzia nabarmen ahulagoa da, nahiz eta zenbait enpresatan aurrerapauso garrantzitsuak eman diren.

Hori horrela izanik, eta kontuan hartuta lan-mundua ezinbesteko eremua dela euskararen sustapenerako, behean sinatzen duten entitateek honako hitzarmena egitea erabaki dute.

HITZARMENA

1.- HELBURUA. Hitzarmenaren helburua da Bergarako enpresak euskara sustatzeko urratsak ematea lan-mundua ere euskarazko eremu bihurtzeko.

2.- ENTITATEEN KONPROMISOAK.

Hitzarmena sinatzen duten entitateek honako konpromisoak hartzen dituzte:

Oinarrizko konpromisoak.

- Enpresak HARIXA programarako solaskidea izendatzea eta langileei hitzarmenaren berri zabaltzea.
- Enpresako hizkuntza-egoeraren diagnostiko laburra egitea, talde teknikoak finkatutako ereduaren arabera eta haren laguntzarekin.
- Hitzarmen kideen arteko harremanetan euskara sustatzea eta gutxienez beste hitzarmenkideen euskarazko idatziak onartzea.
- Urterako egitasmoa zehaztea eta bertan, gutxienez, ekintza berri bat jasotzea.

Aurrera begirako garapena. Hitzarmena sinatzen duten enpresa eta entitateen izaera eta hizkuntza-egoera oso desberdina izanik, enpresa bakoitzak bere ibilbidea finkatuko du, urratsez urrats konpromiso berriak hartuaz. Hona hemen erreferentzia gisa proposatzen diren konpromisoak:

- Lanbide Heziketako ikasleen egonaldiak euskaraz eskaintzea.
- Langileei zein LH dualeko ikasleei harrera egitean euskarazko baliabideen gida eskaintzea: euskara ikasteko aukerak, euskara praktikatzekoak...

- Hizkuntza paisaia euskaratzea.
- Langileei euskara ikasi edo praktikatzeko bideak eskaintzea: ulersaioak...
- Ahozko erabilera sustatzea: Euskaraldiko ariguneak eta beste.
- Webgunea euskaratzea.
- Hizkuntza irizpideak finkatzea.
- Barne erabilerako dokumentazioa (kontratu, nomina...) euskaraz jartzea.
- Enpresak lana euskalduntzeko izandako esperientzia eta praktika onak zabaltzea.
- Besterik.

Industria enpresa ez direnen konpromisoa. Industria enpresa izan gabe hitzarmen hau sinatzen duten entitateek (ikastetxe, euskara elkarte, banketxe eta abar) konpromisoa hartzen dute industria lantegiekin dituzten harremanetan euskara bultzatzeko euren zerbitzuak euskaraz eskainiaz, sustapen-jardueretan lagunduaz, eta abar.

3. HITZARMENAREN, DINAMIZAZIOA, JARRAIPENA ETA LAGUNTZABIDEAK.

Bergarako Udalak behar diren giza baliabideak jarriko ditu hitzarmenaren dinamizazioaz eta jarraipenaz arduratzeko.

Era berean, bestelako laguntza eta zerbitzuak ere eskainiko dizkie hitzarmeneko partaide diren entitateei, honakoak, adibidez:

- Lanerako lagungarrien sareko bilgunea, enpresei askotariko baliabideak eskainiko dizkiena: hiztegiak, euskarazko ereduak, praktika onen informazioa...
- Konpromiso bakoitzerako baliabideen gida.
- Euskara ikasi edo praktikatzeko bideak: ulersaioak, mintzalaguna...
- Udalak enpresei eskaintzen dizkien dirulaguntzetan hizkuntza irizpideak txertatzea...
- ...

Jarraipen batzordea. Hitzarmenaren jarraipena egiteko eta norabidea zehazteko lan-mahaia eratuko da hitzarmena sinatu duten entitateetako ordezkari osatua. Lan-mahaia hiru hilean behin elkartuko da, gutxienez.

Hitzarmena sinatu eta 2 urte igarotakoan tarteko ebaluazioa egingo da.

4. HITZARMENAREN IRAUPENA

Hitzarmen honen iraupena 4 urtekoa izango da.